

2 TESARONIKA

Pauru Nymerohpyry ropa

Tesaronika pōkō Neneryme

2 Tessalonicenses

Ekarotopo

Pauru nymerohpyry apitorymā tonese ahtao ro Tesaronika pōkomo a, tōsezusezuhse toto Jezu Kyrixtu Tosēkō oepyyry ropa poko. Toitoine: “Jezu toehse ropa pake,” tykase toh repe. Imehnomo: “Oehsasaka mana,” tykase; toerohtohkō turumekase eya xine aepyry eraximatohme, imeimehnō maro rokē otuhnōko toh kynexine.

Naeroro sero *2 Tesaronika* tymerose Pauru a Ritonōpo omipona exiketō akorehmatohme, azahkuru toto ehtoh kurākatohme. Ynara tokarose eya xine: Jezu Kyrixtu oehtohto popyry ehtoh emānōko itamurume sero nono po. Imepÿ: “Irypyrymano,” orēpyra exīko, oximōme sero nono pōkō arōko mana, Ritonōpo zehno exiketomo, Ritonōpo poetory tō poremākatohme repe. Yrome mokaro poremākāko Ritonōpo mana. Tynymenekatyā pynanohnōko mana, jūme toto ewomāko mana. Naeroro orēpyra ehtoko Jezu enetuputyry poko, ajohpe ehtoh onekahmara ehtoko. Toto tamorepase roropa eya akīme pyra ehtohme (2 Tesaronika 3.10).

Sero pape ao

Osekarotopo 1.1-2

Sero etyhpyry poko 1.3–2.12

1. Sero pōkō apiakary poko 1.3-12

2. Ritonõpo zehnotokomo 2.1-12
 Zae Jezu poetory tõ exiry 2.13–3.15
 Osekazumãko 3.16-17
 Kure ehtoh ripõko 3.18

¹ Ynanymerohpyry moro onenerykõme. Ywy ase Pauru. Xira te, Timoteu roropa, enara ymaro mana taro.

Amarokõ Jezu poetoryme Tesaronika po. Ritonõpo poetoryme matose, Kumykõ poetoryme Kuesëkõ Jezu Kyrixtu enetupuhnanõme oexirykõke.

² “Papa, kure rokẽ Tesaronika põkõ tyripoko. Torëtyke pyra roropa tyripoko toto,” äko ynanase Ritonõpo a, Kumykomo a, Kuesëkõ Jezu Kyrixtu a roropa.

Sero nono põkõ apiakary poko

³ Wekyry tomo, ynara kakehpyra ynanase Ritonõpo a opoko xine: “Kure mase, Ritonõpo,” kakehpyra ynanase. Tãkye yna exiryke opoko xine. Morara äko ynanase, Jezu enetuputyry emamyryke okurohtao xine. Imehnõ pyno exïko matose ipunaka.

⁴ Morara exiryke opoko xine kure oturũko ynanase Jezu poetory oximõmãkõ netaryme, toanahtose itamurume oya xine exiryke ohtomarykohtao. Yrome onenetupuhkehpyra matose. Oryhmatorÿko pohnõ mã repe. Yrome eanahtõko rokẽ matose.

⁵ Omenekatorÿko Ritonõpo mana tuisame oehtokõme imaro. Aomipona oexirykõke ohtomatorÿko imehnõ mana. Yrome eanahtõko matose. Õseanahtotopõpyrykõ waro imehnõ

ahtao, zae Ritonõpo exiry enetupuhnõko mã toto, kuapiakarykõ poko eya.

⁶ Zae Ritonõpo exiryke ohtomahpõkõ htomãko roropa mana, ohtomatamitukõme.

⁷ Ohtomakehpotorỹko ropa mana toanahtose oya xine exiryke. Yna roropa htomakehpõko mana. Morara tyrĩko mana Kuesẽkõ Jezu oepyry ropa ahtao kapu ae tynenyohtyã kapuaõkõ jamihmãkõ maro.

⁸ Apoto konõto tororokane maro oehnõko mana Ritonõpo waro pyra exiketõ wãnohpotohme. Aomipona pyra exiketõ roropa wãnohpõko mana, ynanekarohpyry Kuesẽkõ Jezu poko totase eya xine exiryke. Yrome onenetupuhpyra toto exiryke toto wãnohpõko Ritonõpo mana.

⁹ Toto rypyry emetakame toto pahñõko mana apoto konõto htaka. Etuarimakehpyra mã toto jũme. Kuesẽkõ esaka ytopyra toto; jũme imehxo aexiry onenepyra ekurehnõko mã toto.

¹⁰ Jezu tooehse ropa ahtao tosẽkõ eahmãko ipotory tõ mana. “Imehxo mase,” ãko toto, Jezu enetupuhnanomo. Mokaro maro exĩko matose roropa, ynanekarohpyry tonetupuhse oya xine exiryke.

¹¹ Morara exiryke oturukehpyra ynanase opoko xine Ritonõpo netaryme: “Papa, Tesaronika põkõ kure toexirykõ se mana. Akorehmako toto omũkuru nymyry sã toto ehtohme, oya toahmase toto exiryke opoenõme toto ehtohme. Jezu enetupuhnõko toto. Ijamihtanohko toto ýme toto ehtohme õmipona. Akorehmako toto imehnõ akorehmatohme roropa Jezu enetuputyry poko,” ãko ynanase.

¹² Morara awahtao xine imehnõ ynara äko: “Kure imehxo Kuesëkõ mana,” äko toto oenerykõke. Jezu roropa ynara äko kyya xine: “Kure matose,” äko. Toipe Jezu Kyrixtu kure rokë typoe-tory tõ rïko mana. Isaaro roropa Ritonõpo mana.

2

Iirypyrymä poko

¹ Wekyry tomo, oururukõ se ynanase Kuesëkõ Jezu Kyrixtu oepyry ropa poko, imaro oximõme kuytorykõ poko roropa.

² Oty katox axĩ osenekunohpõko matou? Osenekunohpopyra ehtoko: “Jezu tooehse ropa, pake,” karyhtao imehnomo a. Emynyhmara roropa ehtoko. Otarãme morara äko amorepatõ mã repe ajohpe rokene. Otarãme: “Morara tykase Pauru nymerohpyry,” äko imepỹ repe. Yrome morara kapitopyra ase. Ajohpãkõ omiry rokë moro.

³ Tomeseke ehtoko oenekunohpopyra xine imehnõ ehtohme. Tuarõ ehtoko, Ritonõpo zehnotokõ osemazuhme oehnõko mana. Iirypyrymä pohto rokë kara oehnõko roropa mana. Imeĩpo Ritonõpo nemary mokyro apoto konõto htaka. Onypynanohsaromepyra imehnõ mana, jũme. Mokaro tooehse ahtao rokë Jezu oehnõko ropa mana.

⁴ Pyaximehxo osekarõko mokyro mana. “Ritõ kõ motye ase, oesëkõ motye,” äko mã ynororo: “Imehxo mase,” katohme imehnomo a repe typoko. Porohnõko mana Ritonõpo Tapyĩ tao. “Ritonõpome ase,” äko kahpyry mã repe imehnõ enekunoh-tohme rokene.

⁵ Moro poko oturuase oya xine amaro xine ro jahtao. Tuenikehse matou ynekarohpyry poko oya xine?

⁶ Seromaroro mokyro oehpopyra exikety nae. Zuaro matose. Yrome toehtoh po toehse ahtao mokyro oehnõko mana liryppyrymã pohto rokẽ kara.

⁷ Mokyro Ritonõpo omipona pyra imehnõ ripone. Imehnõ enekunopyry poko erohnõko mana seromaroro, omatome. Yrome mokyro akorekehkãko imepÿ mana, onekunohtõ akorekehkãko mana toytotoh pona ro.

⁸ Morarame mokyro liryppyrymã pohto rokẽ kara osenepõko mana. Yrome tooehse ropa Kuesẽkõ ahtao mokyro etapãko mana. Toïro puu katoh ke mokyro enahkãko mana orẽpyrahxo tysaerehkatoh ke.

⁹ Mokyro liryppyrymã joroko tamuru jamitunuru poe orẽpyra ikyrÿko mana imehnõ enuruhkapotohme, enekunohtohme rokene.

¹⁰ Tyyrypyry ke toto enekunohnõko itamurume tymaro apoto konõto htaka toto ytotohme. Jezu omiry anapoipyra mã toto, ise pyra toexirykõke. Morara exiryke toto onypynanohpyra ekurehnõko mana.

¹¹ Morara exiryke ynara ãko Ritonõpo: “Ah nosenekunohno toto,” ãko Ritonõpo toto poko, ajohpãkõ omipona toto ehtohme.

¹² Morarame toto rypyry emetakamãko Ritonõpo mana tõmiry onenetupuhpyra toto exiryke, tyyrypyrykõ poko rokẽ tãkye toto exiryke.

Tymenekase matose okurãkatohkõme

¹³ Wekyry tomo, Kuesëkõ opyno xine mana. Ritonõpo nymenekatyãme matose moino ro, opynanohtohkõme, okurãkatohkõme roropa Tuzenu a, aomiry enetuputyryhtao oya xine. Morara exiryke: “Kure mase, Ritonõpo,” kary se ynanase kokoro rokene opoko xine.

¹⁴ Ritonõpo oeahmatose, Jezu poko yna a ãmoreparykohtao. Oeahmatose tymaro oehtohkõme: “Kuesëkõ Jezu Kyrixtu imehxo mana,” karyhtao ipoetory tomo a.

¹⁵ Toahmase oexirykõke poremãpyra ehtoko. Wekyry tomo, yna a ãmorepatopõpyrykõ omipona ehtoko. Yna a ourutopõpyrykõ omipona ehtoko, ynanymerohpyry onenerykõ omipona ehtoko roropa, enara.

¹⁶ Ynara ãko ynanase Kuesëkõ Jezu Kyrixtu a Kumykõ Ritonõpo a roropa: “Papa, yna pyno mexiase. Yna pyno oexiryke yna eano tyjamihtanohpose oya poremãpyra jũme yna ehtohme. Ooepyry ropa momohnõko ynanase.

¹⁷ Tesaronika põkõ eanokõ ijamihtanohko poremãpyra toto ehtohme imehnõ akorehmatohme toto a, kure imehnõ zurutohme roropa, enara,” ãko ynanase.

3

Oturutoko Ritonõpo a yna akorehmatohme eya

¹ Wekyry tomo, ynara kary se ropa ynanase oya xine. Oturutoko Ritonõpo a: “Papa, Pauru tõ akorehmako õmiry ekarory poko imehnomo a, ekurehpyra õmiry otuotuhponamatohme, Jezu poetoryme imehnõ ehtohme õmiry apoiryhtao

tyya xine, Tesaronika pōkō sã toto ehtohme òmiry tapoise ahtao eya xine,” kahtoko.

² Oturutoko Ritonōpo a yna pynanohtohme tapoise yna ahtao pohno mo a, iirypyrymākomo a, tuhke Jezu onenetupuhpynō nae exiryke.

³ Yrome Kuesēkō kurumekara xine mana. Ajamihtanohtorỹko mana, oewomatorỹko joroko tamuru omipona pyra oehtohkōme.

⁴ Tākye ynanase awaro xine yna exiryke. Yna omipona exikehpyra matose, Jezu poetoryme oexirykōke.

⁵ Ynara āko ynanase Kuesēkomo a: “Papa Kapuaono, Tesaronika pōkō amorepako ose ipunaka toto ehtohme. Akorehmako toto tyhtomarykō eanahtotohme, Kyrixtu a tyhtomary eanahtotōpyry samo,” āko ynanase.

Erohtoko kene tuenikaroro sã rokene

⁶ Wekyry tomo, Kuesēkō Jezu Kyrixtu omi poe ynara āko ynanase oya xine, akīme exiketō maro osepeme pyra ehtoko, ynanamorepatopōpyry omipona pyra toto ahtao.

⁷ Akīme pyra ynanexiasene amaro xine yna ahtao. Zuarō matose. Yna ehtopōpyry sã ehtoko, akīme pyra.

⁸ Imehnō zuru poko pyra ynanexiase. Topehmase yna a ahtao rokē ynanenapyase. Ynanerokuase, ynanetuarimase koko, saereme, enara, anapyrykō onenahpyra yna ehtohme.

⁹ Topehke pyra yna otukuru amaro xine kure repe, āmorepanekōme yna exiryke. Yrome yna kure exiry enepotohme oya xine topehke rokē ynanotukuasene amaro xine, ŷme oehtohkōme roropa.

10 Amaro xine yna ahtao ynara ynanase oya xine, toerokuru se pyra exikety anautuhmanohpopyra ehtoko, onykohmara roropa ehtoko, ynanase.

11 Ynara kary totase yna a exiryke: “Akīme exiketō nae Tesaronika pōkō maro. Erohpyra toto ipunaka, imehnō tapyī tō takuroko rokē ytoytōko toto, popyra ehtoh poko rokē oturuse.”

12 Mokaro zurūko ynanase Kuesēkō Jezu Kyrixtu omi poe: “Erohtoko kene tuenikaroro sã ro-kene, tŷkyryneke oehtohkōme, õtuhtohkōme,” āko ynanase.

13 Wekyry tomo, penekēhpyra ehtoko imehnō akorehmary poko.

14 Yna omipona pyra exikety nae ahtao, sero ynanymerohpyry omipona pyra ahtao, mokaro maro pyra ehtoko, toto hxiropotohme. Otarāme yna omipona exīko ropa toh mana.

15 “Zehnotokō mokaro,” kara ehtoko toto poko. Oekyrykōme mokaro tyritoko akorehmatohme oya xine yna omipona toto ehtohme ropa.

Pauru nurutopōpyry etyhpyry

16 Ynara āko ynanase Kuesēkomo a: “Torētyke pyra yna rine mase. Tesaronika pōkō torētyke pyra tyriko kokoro rokene. Toto maro exiko,” āko ynanase.

17 Ywy ase Pauru. Jesety moro tymerose ya jemarky ke rokene. Moro enetupuhtoko ynanymerohpyry. Morara rokē pape aropōko ase onenerykōme.

¹⁸ Ynara ãko ase Kuesêkõ Jezu Kyrixtu a opoko xine: “Papa, kure rokẽ Tesaronika põkõ tyriko,” ãko ase. Enara rokene.

⏏
**Khmer Standard Version of the Holy Bible in
the Khmer Language of Cambodia**

Copyright © 1997, 2005 The Bible Society in Cambodia

⏏

© រក្សាសិទ្ធិដោយសមាគមព្រះគម្ពីរសកល

គ្រប់ ផ្នែក នៃ សៀវភៅ នេះ មិន ត្រូវ បាន ផលិត ឬ ប្រើប្រាស់ តាម ទំរង់ ឬ មធ្យោបាយ បែប អេឡិចត្រូនិក ឬ ម៉ាស៊ីន ណាមួយ រួម ទាំង ការ ថត ចម្លង អាត់ សំលេង ផ្ទុក នូវ ទិន្នន័យ ប្រព័ន្ធ ណាមួយដែលអាចយកមកប្រើ ដោយគ្មានការអនុញ្ញាតពីសមាគមព្រះគម្ពីរកម្ពុជា។ ប្រសិនបើ មានការដកស្រង់អត្ថបទគម្ពីរចាប់ពី ១០០០ខ ឡើងទៅ ត្រូវសុំការអនុញ្ញាតពីសមាគមព្រះគម្ពីរ កម្ពុជា

Quotations of the Bible in Khmer Standard Version in any form, must obtain written permission from the Bible Society in Cambodia if the quoted material is inclusive of at least 1,000 verses, or a copy of any book wholly or partially, which amounts to 50% of the book quoted. For any long quotation, notice of copyright must appear as follows: Text copyright © 1997, 2005 United Bible Societies. Used by permission.

PDF generated using Haiola and XeLaTeX on 25 Apr 2025 from source files dated 26 Apr 2025
fc9611d4-b5f2-5730-b6c2-58f2658eac89